

廣惠肇碧山亭公所第六十六屆董事

爲一九五八年萬緣勝會建碑序文

第六十六屆正總務 李德文

蓋聞低眉菩薩，灑甘露而救蒼生，怒目金剛，覆慈雲而憐赤子，無邊佛法，宏開不夜之門，道妙通玄，廣設華陽之會，是使遊魂蕩魄，獲乘黃鶴而返西天，餒鬼窮魑，得嚙金丹而登仙界，所以戊戌之秋，桂菊之候，廣惠肇碧山亭公所當年董事，三屬僑賢，緣結萬善，醮建三壇，香繞兜羅之樹，蓮開七寶之池，宣佛經於道場，紅魚卜卜，念阿彌於法座，青磬丁丁，梵音聲聞遐邇，法樂响徹雲衢，斯時佛子現金身，到處念超生之咒，道人敲鐵板，沿壇誦救苦之經，法雨慈雲，一時遍佈，號寒露水，三界咸沾，然而吊愁山之滯魄，冬不寒號，濟苦海之幽魂，日無乏食，端賴仁人義士，同生愷切之心，善女信男，共奮捐資之念，解貫朽之贏餘，抒生平之方寸，集腋成裘，同襄善舉，用能勝會超幽，連宵七晝，并且餘款購山，以安窀穸，遂使深山窮谷，猿鶴不感荒涼，幽壑僻郊，草木無虞慘淡，如斯美德，詎可弗彰，追思煙閣，曾流萬載之名，溯念雲台，也著千秋之譽，勒碑刻銘，藉以崇德紀功，援筆成文，亦即婆心勸善。